

四庫全書

史部

欽定四庫全書

史部

左傳紀事本末卷五十二

詳校官侍講學士_臣平恕

編修_臣裴謙覆勘

總校官庶吉士_臣何思鈞

校對官中書_臣嵇承志

謄錄監生_臣羅翺遠

欽定四庫全書

左傳紀事本末卷五十二

詹事府詹事高士奇撰

秦穆公伯西戎

桓公三年芮伯萬之母芮姜惡芮伯之多寵人也故逐之出居於魏四年秋秦師侵芮敗焉小之也冬王師秦師圍魏執芮伯以歸十年秋秦人納芮伯萬於芮僖公九年晉卻芮使夷吾重賂秦以求入曰人實有

國我何愛焉入而能民土於何有從之齊隰朋帥師會秦師納晉惠公十年殺平鄭平豹奔秦言於秦伯曰晉侯背大主而忌小怨民弗與也伐之必出公曰失衆焉能殺違禍誰能出君十三年冬晉薦饑使乞糴於秦秦伯謂子桑與諸乎對曰重施而報君將何求重施而不報其民必攜攜而討焉無衆必敗謂百里與諸乎對曰天災流行國家代有救災恤鄰道也行道有福不鄭之子豹在秦請伐晉秦伯曰其君是惡其民何罪

秦於是乎輸粟於晉自雍及絳相繼命之曰汎舟之役
十四年冬秦饑使乞糴於晉晉人弗與 十五年冬

秦伯伐晉戰於韓原晉戎馬還泞而止公號慶鄭慶鄭
曰懷諫違卜固敗是求又何逃焉遂去之良由靡御韓
簡驍射為右輅秦伯將止之鄭以救公誤之遂失秦伯
秦獲晉侯以歸晉大夫反首拔舍從之秦伯使辭焉曰
二三子何其感也寡人之從君而西也亦晉之妖夢是
踐豈敢以至晉大夫三拜稽首曰君履后土而戴皇天

皇天后土實聞君之言羣臣敢在下風穆姬聞晉侯將至以太子瑩弘與女簡璧登臺而履薪焉使以免服衰經逆且告曰上天降災使我兩君匪以玉帛相見而以興戎若晉君朝以入則婢子夕以死夕以入則朝以死唯君裁之乃舍諸靈臺大夫請以入公曰獲晉侯以厚歸也既而喪歸焉用之大夫其何有焉且晉人感憂以重我天地以要我不圖晉憂重其怒也我食吾言背天地也重怒難任背天不祥必歸晉君公子繫曰不如殺之

無聚慝焉子桑曰歸之而質其太子必得大成晉未可滅而殺其君祇以成惡且史佚有言曰無始禍無怙亂無重怒重怒難任陵人不祥乃許晉平晉侯使卻乞告取呂飴甥且召之子金教之言曰朝國人而以君命賞且告之曰孤雖歸辱社稷矣其卜貳圉也衆皆哭晉於是乎作爰田呂甥曰君亡之不恤而羣臣是憂惠之至也將若君何衆曰何為而可對曰征繕以輔孺子諸侯聞之喪君有君羣臣輯睦甲兵益多好我者勸惡我者

懼庶有益乎衆說晉於是乎作州兵初晉獻公筮嫁伯姬於秦遇歸妹䷵之睽䷥史蘇占之曰不吉其繇

曰士刳羊亦無益也女承筐亦無貺也西鄰責言不可償也歸妹之睽猶無相也震之離亦離之震為雷為火為羸敗姬車說其輶火焚其旗不利行師敗於宗丘歸妹睽孤寇張之弧姪其從姑六年其逋逃歸其國而棄其家明年其死於高梁之虛及惠公在秦曰先君若從史蘇之占吾不及此夫韓簡侍曰龜象也筮數也物生

而後有象象而後有滋滋而後有數先君之敗德及可
數乎史蘇是占勿從何益詩曰下民之孽匪降自天傳
沓背憎職競由人十月晉陰飴甥會秦伯盟於王城秦
伯曰晉國和乎對曰不知小人恥失其君而悼喪其親
不憚征繕以立圉也曰必報讎寧事戎狄君子愛其君
而知其罪不憚征繕以待秦命曰必報德有死無二以
此不和秦伯曰國謂君何對曰小人感謂之不免君子
恕以為必歸小人曰我毒秦秦豈歸君君子曰我知罪

矣秦必歸君貳而執之服而舍之德莫厚焉刑莫威焉服者懷德貳者畏刑此一役也秦可以霸納而不定廢而不立以德為怨秦不其然秦伯曰是吾心也改館晉侯饋七牢焉蛾析謂慶鄭曰盍行乎對曰陷君於敗敗而不死又使失刑非人臣也臣而不臣行將焉入十一月晉侯歸丁丑殺慶鄭而後入是歲晉又饑秦伯又餽之粟曰吾怨其君而矜其民且吾聞唐叔之封也箕子曰其後必大晉其庸可冀乎姑樹德焉以待能者於是

秦始征晉河東置官司焉 十七年夏晉太子圉為質
於秦秦歸河東而妻之惠公之在梁也梁伯妻之梁嬴
孕過期卜招父與其子卜之其子曰將生一男一女招
曰然男為人臣女為人妾故名男曰圉女曰妾及子圉
西質妾為宦女焉 二十二年晉太子圉為質於秦將
逃歸謂嬴氏曰與子歸乎對曰子晉太子而辱於秦子
之欲歸不亦宜乎寡君之使婢子侍執巾櫛以固子也
從子而歸棄君命也不敢從亦不敢言遂逃歸 十八

年梁伯益其國而不能實也命曰新里秦取之 十九
年春遂城而居之梁亡不書其主自取之也初梁伯好
土功亟城而弗處民罷而弗堪則曰某寇將至乃溝公
宮曰秦將襲我民懼而潰秦遂取梁 二十三年晉公
子重耳之及於難也晉人伐諸蒲城蒲城人欲戰重耳
不可曰保君父之命而享其生祿於是乎得有人有人而
校罪莫大焉吾其奔也遂奔狄從者狐偃趙衰顓頊魏
武子司空季子狄人伐廐咎如獲其二女叔隗季隗納

諸公子公子取季隗生伯儵叔劉以叔隗妻趙衰生盾
將適齊謂季隗曰待我二十五年不來而後嫁對曰我
二十五年矣又如而是而嫁則就木焉請待子處狄十二
年而行過衛衛文公不禮焉出於五鹿乞食於野人野
人與之塊公子怒欲鞭之子犯曰天賜我也稽首受而
載之及齊齊桓公妻之有馬二十乘公子安之從者以
為不可將行謀於桑下蠶妾在其上以告姜氏姜氏殺
之而謂公子曰子有四方之志其聞之者吾殺之矣公

子曰無之姜曰行也懷與安實敗名公子不可姜與子
犯謀醉而遣之醒以戈逐子犯及曹曹共公聞其駢脅
欲觀其裸浴薄而觀之僖負羈之妻曰吾觀晉公子之
從者皆足以相國若以相夫子必反其國反其國必得
志於諸侯得志於諸侯而誅無禮曹其首也子盍蚤自
貳焉乃饋盤飧寘璧焉公子受飧反璧及宋宋襄公贈
之以馬二十乘及鄭鄭文公不禮焉叔詹諫曰臣聞天
之所啟人弗及也晉公子有三焉天其或者將建諸君

其禮焉男女同姓其生不蕃晉公子姬出也而至於今
一也離外之患而天不靖晉國殆將啟之二也有三士
足以上人而從之三也晉鄭同儕其過子弟固將禮焉
況天之所啟乎弗聽及楚楚子饗之曰公子若反晉國
則何以報不穀對曰子女玉帛則君有之羽毛齒革則
君地生焉其波及晉國者君之餘也其何以報君曰雖
然何以報我對曰若以君之靈得反晉國晉楚治兵遇
於中原其辟君三舍若不獲命其左執鞭弭右屬橐鞬

以與君周旋子玉請殺之楚子曰晉公子廣而儉文而有禮其從者肅而寬忠而能力晉侯無親外內惡之吾聞姬姓唐叔之後其後衰者也其將由晉公子乎天將興之誰能廢之違天必有大咎乃送諸秦秦伯納女五人懷嬴與焉奉匜沃盥既而揮之怒曰秦晉匹也何以卑我公子懼降服而囚他日公享之子犯曰吾不如衰之文也請使衰從公子賦河水公賦六月趙衰曰重耳拜賜公子降拜稽首公降一級而辭焉衰曰君稱所以

佐天子者命重耳重耳敢不拜 二十四年春王正月
秦伯納之不書不告入也及河子犯以璧授公子曰臣
負羈紼從君巡於天下臣之罪甚多矣臣猶知之而况
君乎請由此亡公子曰所不與舅氏同心者有如白水
投其璧於河 二十五年秦伯師於河上將納王狐偃
言於晉侯曰求諸侯莫如勤王諸侯信之且大義也繼
文之業而信宣於諸侯今為可矣使卜偃卜之曰吉遇
黃帝戰於阪泉之兆公曰吾不堪也對曰周禮未改今

之王古之帝也公曰筮之筮之遇大有䷍之睽䷥

曰吉遇公用享於天子之卦戰克而王饗吉孰大焉且是卦也天為澤以當日天子降心以逆公不亦可乎大有去睽而復亦其所也晉侯辭秦師而下三月甲辰次於陽樊右師圍溫左師逆王夏四月丁巳王入於王城取大叔於溫殺之於隰城戊午晉侯朝王王饗醴命之宥請隧弗許曰王章也未有代德而有二王亦叔父之所惡也與之陽樊溫原欒茅之田晉於是始啟南陽陽

樊不服圍之倉葛呼曰德以柔中國刑以威四夷宜吾不敢服也此誰非王之親姻其俘之也乃出其民秋秦晉伐郤楚以申息之師戍商密秦人過析隈入而係輿人以圍商密昏而傳焉宵坎血加書偽與子儀于邊盟者商密人懼曰秦取析矣戍人反矣乃降秦師秦師囚申公子儀息公子邊以歸三十年九月甲午晉侯秦伯圍鄭以其無禮於晉且貳於楚也晉軍函陵秦軍汜南佚之狐言於鄭伯曰國危矣若使燭之武見秦君

師必退公從之辭曰臣之壯也猶不如人今老矣無能為也已公曰吾不能早用子今急而求子是寡人之過也然鄭亡于亦有不利焉許之夜縋而出見秦伯曰秦晉圍鄭鄭既知亡矣若亡鄭而有益於君敢以煩執事越國以鄙遠君知其難也焉用亡鄭以陪鄰鄰之厚君之薄也若舍鄭以為東道主行李之往來共其乏困君亦無所害且君嘗為晉君賜矣許君焦瑕朝濟而夕設版焉君之所知也夫晉何厭之有既東封鄭又欲肆其西

封若不闕秦將焉取之闕秦以利晉唯君圖之秦伯說
與鄭人盟使杞子逢孫揚孫戍之乃還子犯請擊之公
曰不可微夫人之力不及此因人之力而敝之不仁失
其所與不知以亂易整不武吾其還也亦去之 三十
二年冬晉文公卒杞子自鄭使告於秦曰鄭人使我掌
其北門之管若潛師以來國可得也穆公訪諸蹇叔蹇
叔曰勞師以襲遠非所聞也師勞力竭遠主備之無乃
不可乎師知所為鄭必知之勤而無所必有悖心且行

千里其誰不知公辭焉召孟明西乞白乙使出師於東門之外蹇叔哭之曰孟子吾見師之出而不見其入也公使謂之曰爾何知中壽爾墓之木拱矣蹇叔之子與師哭而送之曰晉人禦師必於殽殽有二陵焉其南陵夏后臯之墓也其北陵文王之所辟風雨也必死是間余收爾骨焉秦師遂東

補逸公羊傳其謂之秦何夷狄之也曷為夷狄之秦伯

將襲鄭百里子與蹇叔子諫曰千里而襲人未有不

亡者也秦伯怒曰若爾之年者宰上之木拱矣爾曷知師出百里子與蹇叔子送其子而戒之曰爾即死必於穀之嶽巖是文王之所辟風雨者也我將尸爾焉子揖師而行百里子與蹇叔子從其子而哭之秦伯怒曰爾曷為哭吾師對曰臣非敢哭君師哭臣之子也弦高者鄭商也遇之穀矯以鄭伯之命而犒師焉或曰往矣或曰反矣然而晉人與姜戎要之穀而擊之匹馬隻輪無反者其言及姜戎何姜戎微也稱

人亦微者也何言乎姜戎之微先軫也或曰襄公親之襄公親之則其稱人何貶曷為貶君在乎殞而用師危不得葬也詐戰不日此何以日盡也

穀梁傳不言戰而言敗何也狄秦也其狄之何也秦越千里之險入虛國進不能守退敗其師徒亂人子女之教無男女之別秦之為狄自殺之戰始也秦伯將襲鄭百里子與蹇叔子諫曰千里而襲人未有不亡者也秦伯曰子之冢木已拱矣何知師行百里子

與蹇叔子送其子而戒之曰女死必於穀之巖啗之
下我將尸汝於是師行百里子與蹇叔子隨其子而
哭之秦伯怒曰何為哭我師也二子曰非敢哭師也
哭吾子也我老矣彼不死則我死矣晉人與姜戎要
而擊之穀匹馬倚輪無反者晉人者晉子也其曰人
何也微之也何為微之不正其釋殯而主乎戰也日
葬危不得葬也

三十三年春秦師過周北門左右免冑而下趨乘者三

百乘王孫滿尚幼觀之言於王曰秦師輕而無禮必敗
輕則寡謀無禮則脫入險而脫又不能謀能無敗乎及
滑鄭商人弦高將市於周遇之以乘韋先牛十二犒師
曰寡君聞吾子將步師出於敝邑敢犒從者不腆敝邑
為從者之淹居則具一日之積行則備一夕之衛且使
遽告於鄭鄭穆公使視客館則束載厲兵秣馬矣使皇
武子辭焉曰吾子淹久於敝邑唯是脯資餼牽竭矣為
吾子之將行也鄭之有原圃猶秦之有具囿也吾子取

其麋鹿以間敝邑若何杞子奔齊逢孫揚孫奔宋孟明
曰鄭有備矣不可冀也攻之不克圍之不繼吾其還也
滅滑而還 夏四月辛巳晉人及姜戎敗秦帥於殽獲
百里孟明視西乞術白乙丙以歸文嬴請三帥曰彼實
構吾二君寡君若得而食之不厭君何辱討焉使歸就
戮於秦以逞寡君之志若何公許之先軫朝問秦囚公
曰夫人請之吾舍之矣先軫怒曰武夫力而拘諸原婦
人暫而免諸國墮軍實而長寇讎亡無日矣不顧而唾

公使陽處父追之及諸河則在舟中矣釋左驂以公命
贈孟明孟明稽首曰君之惠不以累臣累鼓使歸就戮
於秦寡君之以為戮死且不朽若從君惠而免之三年
將拜君賜秦伯素服郊次鄉師而哭曰孤違蹇叔以辱
二三子孤之罪也不替孟明孤之過也大夫何罪且吾
不以一眚掩大德

攷異

書序秦穆公伐鄭晉襄公帥師敗諸崤還歸作秦

誓

發明秦誓之作序以為在敗崤還歸之時史謂在取王
官封尸之後

文公元年殽之役晉人既歸秦帥秦大夫及左右皆言
於秦伯曰是敗也孟明之罪也必殺之秦伯曰是孤之
罪也周芮良夫之詩曰大風有隧貪人敗類聽言則對
誦言如醉匪用其良覆俾我悖是貪故也孤之謂矣孤
實貪以禍夫子夫子何罪復使為政 二年春王二月
甲子晉侯及秦師戰於彭衙秦師敗績 秦伯猶用孟

明孟明增修國政重施於民趙成子言於諸大夫曰秦師又至將必辟之懼而增德不可當也詩曰毋念爾祖聿修厥德孟明念之矣念德不怠其可敵乎 冬晉先

且居宋公子成陳轅選鄭公子歸生伐秦取汪及彭衙而還以報彭衙之役卿不書為穆公故尊秦也謂之崇德 三年秦伯伐晉濟河焚舟取王官及郊晉人不出遂自茅津濟封殽尸而還遂霸西戎用孟明也君子是以知秦穆公之為君也舉人之周也與人之壹也孟明

之臣也其不解也能懼思也子桑之忠也其知人也能
舉善也詩曰于以采蘋于沼于汙于以用之公侯之事
秦穆有焉夙夜匪解以事一人孟明有焉詒厥孫謀以
燕翼子子桑有焉 四年秋晉侯伐秦圍祁新城以報
王官之役 楚人滅江秦伯為之降服出次不舉過數
大夫諫公曰同盟滅雖不能救敢不矜乎吾自懼也君
子曰詩云惟彼二國其政不獲惟此四國爰究爰度其
秦穆之謂矣

補逸史記晉獻公滅虞虢虜虞君與其大夫百里奚以

璧馬賂於虞故也既虜百里奚以為秦穆公夫人媵
於秦百里奚亡秦走宛楚鄙人執之穆公聞百里奚
賢欲重贖之恐楚人不與乃使人謂楚曰吾媵臣百
里奚在焉請以五羖羊皮贖之楚人遂許與之當是
時百里奚年已七十餘穆公釋其囚與語國事謝曰
臣亡國之臣何足問穆公曰虞君不用子故亡非子
罪也固問語三日穆公大說授之國政號曰五羖大

夫百里傒讓曰臣不及臣友蹇叔蹇叔賢而世莫知
臣常游困於齊而乞食餽人蹇叔收臣臣因而欲事
齊君無知蹇叔止臣臣得脫齊難遂之周周王子頹
好牛臣以養牛干之及頹欲用臣蹇叔止臣臣去得
不誅事虞君蹇叔止臣臣知虞君不用臣臣誠私利
祿爵且留再用其言得脫一不用及虞君難是以知
其賢於是穆公使人厚幣迎蹇叔以為上大夫

說苑秦穆公使賈人載鹽徵諸賈人賈人買百里奚

以五羖羊之皮使將車之秦秦穆公觀鹽見百里奚
牛肥曰任重道遠以險而牛何以肥也對曰臣飲食
以時使之不以暴有險先後之以身是以肥也穆公
知其君子也令有司具沐浴為衣冠與語公大說異
日與公孫支論政公孫支大不寧曰君耳目聰明思
慮審察君其得聖人乎公曰然吾說夫奚之言彼類
聖人也公孫支遂歸取鴈以賀曰君得社稷之聖臣
敢賀社稷之福公不辭再拜而受明日公孫支乃致

上卿以讓百里奚曰秦國處僻民陋以愚無知危亡之本也臣自知不足以處其上請以讓之公不許公孫支曰君不用賓相而得社稷之聖臣君之祿也臣見賢而讓之臣之祿也今君既得其祿矣而使臣失祿可乎請終致之公不許公孫支曰臣不肖而處上位是君失倫也不肖失倫臣之過進賢而退不肖君之明也今臣處位廢君之德而逆臣之行也臣將逃公乃受之故百里奚為上卿以制之公孫支為次卿

以佐之也

韓詩外傳禽息秦大夫薦百里奚不見納繆公出當車以頭擊闕腦乃精出曰臣生無補於國不如死也繆公感悟而用百里奚秦以大化

呂氏春秋秦穆公相百里奚晉使叔虎齊使東郭寔如秦公孫枝請見之公曰請見客子之事與對曰非也相國使子乎對曰不也公曰然則子事非子之事也秦國僻陋戎夷事服其任人事其事猶懼為諸侯

笑今子為非子之事退將論而罪公孫枝出自敷於
百里氏百里奚請之公曰此所聞於相國歟枝無罪
奚請有罪奚請焉百里奚歸辭公孫枝公孫枝徙自
敷於街百里奚令吏行其罪定分官此古人之所以
為法也今繆公鄉之矣其霸西戎豈不宜哉

史記戎王使由余於秦由余其先晉人也亡入戎能
晉言聞繆公賢故使由余觀秦秦繆公示以宮室積
聚由余曰使鬼為之則勞神矣使人為之亦苦民矣

繆公怪之問曰中國以詩書禮樂法度為政然尚時
亂今戎狄無此何以為治不亦難乎由余笑曰此乃
中國所以亂也夫自上聖黃帝作為禮樂法度身以
先之僅以小治及其後世日以驕淫阻法度之威以
責督於下下罷極則以仁義怨望於上上下下交爭怨
而相篡弑至於滅宗皆以此類也夫戎夷不然上舍
淳德以遇其下下懷忠信以事其上一國之政猶一
身之治不知所以治此真聖人之治也於是繆公退

而問內史廖曰孤聞鄰國有聖人敵國之憂也今由
余賢寡人之害將奈之何內史廖曰戎王處僻匿未
聞中國之聲君試遺其女樂以奪其志為由余請以
疏其閒留而莫遣以失其期戎王怪之必疑由余君
臣有閒乃可虜也且戎王好樂必怠於政繆公曰善
因與由余曲席而坐傳器而食問其地形與其兵勢
盡告而後令內史廖以女樂二八遺戎王戎王受而
說之終年不還於是秦乃歸由余由余數諫不聽繆

公又數使人間要由余由余遂去降秦繆公以客禮
禮之問伐戎之形三十七年秦用由余謀伐戎王益
國十二開地千里遂霸西戎天子使召公過賀繆公
以金鼓

五年初都叛楚即秦又貳於楚夏秦人入郿 六年秦
伯任好卒以子車氏之三子奄息仲行鍼虎為殉皆秦
之良也國人哀之為之賦黃鳥君子曰秦穆之不為盟
主也宜哉死而棄民先王違世猶詒之法而况奪之善

人乎詩曰人之云亡邦國殄瘁無善人之謂若之何奪
之古之王者知命之不長是以並建聖哲樹之風聲分
之采物著之話言為之律度陳之藝極引之表儀予之
法制告之訓典教之防利委之常秩道之以禮則使毋
失其土宜衆隸賴之而後即命聖王同之今縱無法以
遺後嗣而又收其良以死難以在上矣君子是以知秦
之不復東征也

臣士奇曰秦穆公春秋之賢諸侯也驪姬之亂晉

君數弑國幾亡穆公立夷吾及夷吾背德有韓原之戰執晉侯以歸而卒反之晉饑又輸之粟曰吾怨其君而矜其民惠懷無親外內棄之則又置文公以定其難襄王之未入也秦伯師於河上將納王以晉文公納之而止此其天資仁厚舉動光偉加於人一等矣生平之失惟貪燭之武東道主之言而背晉感杞子逢孫揚孫之說而襲鄭則皆利令智昏之所致耳然自敗穀之後素服郊次深自

怨艾作悔過之誓聖人序書特列於百篇之末日
月之更殆難以一晷掩矣至其報恨王官封尸殽
坻成濟河焚舟之功焉其舉人之周與人之壹天
下稱之孟明之始敗也曰孤實貪以禍夫子夫子
何罪及再敗彭衙三敗取汪猶不替孟明因而增
脩國政使趙成子聞聲而知懼子桑知人而終信
以視楚殺得臣晉人竊喜魯用曹沫齊桓反地其
得失不深切著明哉百里奚虞之俘囚也舉之牛

口之下寔叔賢而世莫知五穀大夫薦達之迎以
為上大夫由余戎之賢臣也及其來歸以客禮之
爰是益國十二開地千里遂霸西戎天子使召公
賀以金鼓當是時秦國之強儕於齊晉荆楚則亦
改過不吝用人惟己之所致矣獨其僻在西陲禮
未同於中國而用于車氏之三子以殉黃鳥之詩
作焉秦自此不復能東征矣君子是以惜其盛德
之累也

左傳紀事本末卷五十二

欽定四庫全書

左傳紀事本末卷五十三

詹事府詹事高士奇撰

春秋災異

凡因他事別見者不復更載

隱公元年八月有蜚不為災亦不書 九年春王三月

癸酉大雨霖以震書始也庚辰大雨雪亦如之書時失也凡雨自三日以往為霖平地尺為大雪 桓公元年秋大水凡平原出水為大水 十四年秋八月壬申御

廩災乙亥嘗書不害也 十七年冬十月朔日有食之
不書日官失之也天子有日官諸侯有日御日官居卿
以底日禮也日御不失日以授百官於朝 莊公七年
夏恒星不見夜明也星隕如雨與雨偕也

攷異

公羊傳如雨者非雨也非雨則曷為謂之如雨不
修春秋曰雨星不及地尺而復君子修之曰霽星如
雨何以書紀異也

穀梁傳恒星者經星也不見者可以見也

秋無麥苗不害嘉穀也 十八年秋有盛為災也 二

十五年夏六月辛未朔日有食之鼓用牲于社非常也唯正月之朔慝未作日有食之於是乎用幣於社伐鼓於朝 秋大水鼓用牲於社於門亦非常也凡天災有幣無牲非日月之眚不鼓

補逸穀梁傳言日言朔食正朔也鼓禮也用牲非禮也

天子救日置五麾陳五兵五鼓諸侯置三麾陳三鼓三兵大夫擊門士擊柝言充其陽也高下有水災曰

大水既成鼓而駭衆用牲可以已矣救日以鼓兵救水以鼓衆

二十九年秋有蜚為災也凡物不為災不書 僖公三年春不雨夏六月雨自十月不雨至於五月不曰旱不為災也 十五年夏五月日有食之不書朔與日官失之也 秋震夷伯之廟罪之也於是展氏有隱慝焉

發夷伯者魯大夫也大夫稱伯魯恒有之愚以為無駭疑不能明也

十六年春隕石於宋五隕星也六鷁退飛過宋都風也

補逸公羊傳曷為先言實而後言石實石記聞聞其碩

然視之則石察之則五是月者何僅逮是月也何以
不日晦日也晦則何以不言晦春秋不書晦也朔有
事則書晦雖有事不書曷為先言六而後言鷁六鷁
退飛記見也視之則六察之則鷁徐而察之則退飛
穀梁傳先隕而後石何也隕而後石也於宋四竟之
內曰宋後數散辭也耳治也是月者決不日而月也

六鵠退飛過宋都先數聚辭也自治也

二十一年夏大旱公欲焚巫尪臧文仲曰非旱備也修城郭貶食省用務穡勸分此其務也巫尪何為天欲殺之則如勿生若能為旱焚之滋甚公從之是歲也饑而不害 二十九年秋大雨雹為災也 文公三年秋雨

螽於宋隊而死也 十五年六月辛丑朔日有食之鼓用牲於社非禮也日有食之天子不舉伐鼓於社諸侯用幣於社伐鼓於朝以昭事神訓民事君示有等威古

之道也 十六年有蛇自泉宮出入於國如先君之數
秋八月辛未聲姜薨毀泉臺 宣公十五年冬螽生饑
幸之也 襄公二十七年十一月乙亥朔日有食之辰
在申司歷過也再失閏矣 二十八年春無冰梓慎曰
今茲宋鄭其饑乎歲在星紀而淫於亥枵以有時菑陰
不堪陽蛇乘龍龍宋鄭之星也宋鄭必饑亥枵虛中也
枵耗名也土虛而民耗不饑何為 昭公四年大雨雹
季武子問於申豐曰雹可禦乎對曰聖人在上無雹雖

有不為災古者日在北陸而藏冰西陸朝覲而出之其藏冰也深山窮谷固陰沍寒於是乎取之其出之也朝之祿位賓食喪余於是乎用之其藏之也黑牡秬黍以享司寒其出之也桃弧棘矢以除其災其出入也時食肉之祿冰皆與焉大夫命婦喪浴用水祭寒而藏之獻羔而啟之公始用之火出而畢賦自命夫命婦至於老疾無不受冰山人取之縣人傳之輿人納之隸人藏之夫冰以風壯而以風出其藏之也周其用之也徧則冬

無愆陽夏無伏陰春無淒風秋無苦雨雷出不震無蓄
霜雹癘疾不降民不夭札今藏川池之水棄而不用風
不越而殺雷不發而震雹之為蓄誰能禦之七月之卒
章藏冰之道也 七年夏四月甲辰朔日有食之晉侯

問於士文伯曰誰將當日食對曰魯衛惡之衛大魯小
公曰何故對曰去衛地如魯地於是有災魯實受之其
大咎其衛君乎魯將上卿公曰詩所謂彼日而食於何
不臧者何也對曰不善政之謂也國無政不用善則自

取謫於日月之災故政不可不慎也務三而已一曰擇人二曰因民三曰從時 八月衛襄公卒十一月季武

子卒晉侯謂伯瑕曰吾所問日食從矣可常乎對曰不可六物不同民心不壹事序不類官職不則同始異終胡可常也詩曰或燕燕居息或憔悴事國其異終也如是公曰何謂六物對曰歲時日月星辰是謂也公曰多語寡人辰而莫同何謂辰對曰日月之會是謂辰故以配日 十七年夏六月甲戌朔日有食之祝史請所用

幣昭子曰日有食之天子不舉伐鼓於社諸侯用幣於社伐鼓於朝禮也平子禦之曰止也唯正月朔慝未作日有食之於是乎有伐鼓用幣禮也其餘則否大史曰在此月也日過分而未至三辰有災於是乎百官降物君不舉辟移時樂奏鼓祝用幣史用辭故夏書曰辰不集於房瞽奏鼓嗇夫馳庶人走此月朔之謂也當夏四月是謂孟夏平子弗從昭子退曰夫子將有異志不君君矣二十一年秋七月壬午朔日有食之公問於梓

慎曰是何物也禍福何為對曰二至二分日有食之不為災日月之行也分同道也至相過也其他月則為災陽不克也故常為水於是叔輒哭日食昭子曰子叔將死非所哭也八月叔輒卒二十四年夏五月乙未朔日有食之梓慎曰將水昭子曰旱也日過分而陽猶不克克必甚能無旱乎陽不克莫將積聚也三十一年十二月辛亥朔日有食之是夜也趙簡子夢童子羸而轉以歌旦占諸史墨對曰六年及此月也吳其入郢乎

哀公三年夏五月辛卯司鐸火火踰公宮桓僖災救
火者皆曰顧府南宮敬叔至命周人出御書俟於宮曰
庀女而不在死子服景伯至命宰人出禮書以待命命
不共有常刑校人乘馬巾車脂轄百官官備府庫慎守
官人肅給濟濡帷幕鬱攸從之蒙葺公屋自太廟始外
內以悛助所不給有不用命則有常刑無赦公父文伯
至命校人駕乘車季桓子至御公立於象魏之外命救
火者傷人則止財可為也命藏象魏曰舊章不可亡也

富父槐至曰無備而官辦者猶拾藩也於是乎去表之
豪道還公宮孔子在陳聞火曰其桓僖乎十二年冬
十二月螽季孫問諸仲尼仲尼曰丘聞之火伏而後蟄
者畢今火猶西流司歷過也


臣士奇曰春秋二百四十二年之間凡紀災異一
百二十二日食三十六也星孛三也星隕隕石各
一也不雨七也無冰三也大雨震電一也雨雪三
也大雨雹三也地震五也山崩二也大水九也有

年二也大旱二也饑三也無麥苗一也大無麥禾
一也隕霜不殺草李梅實一也隕霜殺菽一也雨
木冰一也多麋有蜚有蜚螽生各一也六鷁退飛
一也螟三也蝥十也牛傷四也牛死二也宮室災
六也震廟一也屋壞二也齊大災一也宋陳衛鄭
災一也宋陳災各一也其間非無驚世駭俗更甚
於此者而聖人不書至陰陽寒暑草木蟲蠕之變
凡切於人事之休咎天道之應違者不以微而不

察焉以此見聖人之不語怪而念是民生日用至急也然春秋備記災祲以垂鑒戒而不言其事應誠有深意以為言之而一有不應則適以怠後世恐懼修省之心且為矯誣者口實也洪範五行傳事事而強為之說其亦未達聖人之旨矣日食之不書朔與日者傳皆得而推之而有莘之神降泉臺之蛇數絳郊之龍見魏榆之石言彭生之豕禍伯有之厲鬼鄭南門之蛇妖宋華氏之犬禍烏呼

嘻出而毫社災歌徵鸛鵒而稠父孫絳市之謀殺
七日而能蘇鄭滿之首載專車而眉見事之所有
未可云理之所無特以言不雅馴聖人不道而左
氏輯其遺聞附著於冊非特以侈新奇亦所以昭
勸戒也然已屬後世史家之濫觴矣夫芝草醴泉
甘露神雀之祥終春秋世豈無一見而經與傳舉
不及焉惟西郊獲麟一繫簡末以昭制作文成之
應而且以傷吾道之窮也春秋之紀祥異亦慎矣

哉



左傳紀事本末卷五十三